

上虞縣志校續卷四十九

文徵外編三

王侍御事略序

國朝
陳鶴徵

鶴徵自幼屈首受書卽好論說古今政治之得失人物之賢否每見名公偉人立德立功照耀簡策恨不親炙之也皇清鼎興大啓言路九維王公在西臺所上論列皆與昔賢頡頏已而持斧關西視鹺北地定大難拯殘黎其措置施行間從邸報中覩之輒深仰止壬辰秋應詔入都求問公則已出宰金華又五載鶴徵分符爲上虞令始知公蓋

上虞縣志校續

卷四十九

文徵外編

一

虞產也父老爲言公代有名德尊人別駕公佐大司空治河渠著異績齊魯淮泗間至今頌述不衰家居時數出囊底餘智襄郡邑大夫爲福桑梓以是實篤生公能以箕子之明夷先否後喜公今雖久宦乎家殖甚落子弟咸馴謹退讓有萬石君家風鶴徵驗之信然益心嚮往之尙未接公光儀也閱三載鶴徵旣去官扁舟草履往來兩浙山水間今歲至太末還過雙溪公訪諸蕭寺執手誣諉曰余知子久矣似可與語者因慷慨言其生平又出事略一編曰此我友所敘述也鶴徵受而卒業益聞所未聞然公之出

處建立變化神奇更僕不能悉數合所言所敘觀之未可得半至若鶴徵往日慕公於章疏間抑又管中窺豹也已秦地回族將叛如厝火積薪莫之知備公本繡衣使者無封疆軍旅之責獨爲之燕居深念及一旦稱戈相向能子身坐堂皇諭以順逆不懼不撓視郭令公單騎見藥葛羅其難十倍而出奇制勝使雄藩底寧此公經濟之最大者乃鶴徵之重公更在加築滹沱河隄而免萬竈之產蛙議改漢中運糧以甦千里之民命識莫高焉澤莫厚焉至於今之治葵也不以侍從貴臣而心存褻越不以歷年寢久

而稍有意終道州之陽城春陵之元結何以過在昔唐宗大僚出領郡縣皆仍臺閣官階表奏陳乞得竟至上前號爲中外一體今制雖不古而上官終敬愛公故志意得行葵人倍蒙其惠獨計才德如公以之鎮撫方夏必得使反側革心以之平章軍國必能致清和咸理天佑蒼生當不令久淹下位且勿具論但就茲事略言之有保民之規條可以爲世準繩有用兵之偉略可以生人勇智於其鬼神効靈而知盛德之食報撫其室家聚順而知和氣之致祥斯亦政治人物觀感之林也豈必泛論古今遠慕而欲親

炙之乎若夫長君遇鳴散金辭榮遄歸子舍亦復侷儻非
常不愧名父之子鶴徵舊宰公鄉與有采風之任爰抒鄙
衷綴之簡末讀是編者庶不以是爲阿所好乎

倪文貞公年譜序

徐倬

夫譜系者國史之根柢也蘭臺著作先蒐家乘顧非其人
則其文不傳卽其人足傳而無關於宗社之存亡天命之
去留則傳亦不久久亦不能發人之尙論悲思焉嘗讀睢
陽傳後之書桑海遺民之錄其於見危授命殺身成仁之
義摹寫淋漓文章頓挫百世之下嗚咽涕泗然此猶出自

上虞縣志校續

卷四十九

文徵外編

三

他人手筆也若夫孤子操觚諸孫讐字墨和淚漬血與汗
青如會稽倪公年譜有不初讀之而慨嘆再讀之而泣下
浪浪者乎公之學問似邵康節其孤忠粹白似諸葛君數
陳剴切如陸敬輿才猷方略如李伯紀抗節隕身如文文
山固光嶽間氣所鍾而亦祖宗三百年培養之一人也公
初仕時貂璫肆虐觸迂忌諱幾致危殆及沖聖登極初旦
揚暉太阿新御而宮鄰金虎之徒尙蟠互隱伏於朝堂之
左右公抗陳三疏毀要典辨東林伸乾坤之正氣分流品
之清濁王心大定國是分明且身居講幄其所啓沃皆能

裨益時政君臣遇合權同魚水使公而不去左右丹旻隨時補救世事雖非尙可撐持而柄臣媚嫉必欲去之以舟楫霖雨之傳說使爲遜荒舊學之甘盤當時之論不獨爲公惜而實爲天下國家惜也迨夫鋒車應召單旅勤王佐中樞而主國計左枝右梧心枯血竭而虞淵之沉不可復升矣泗水之淪不可復出矣公惟有攀龍髯騎箕尾辦一死以報主耳嗚呼痛哉天乎人也其時人望所屬有漳浦黃公山陰劉公及吾公而三鼎足並峙神山相望然黃劉二公尙或迂濶不近事情而公通達時務真實經濟其制

虛制實入策有明徵也故當宁信之最深言無不從迨公去位而聖明回惑視聽易淆其於政事也倏寬而倏嚴其於人才也有邪而有正皆以無人啓沃之故也然則公之一身不大關乎宗社之存亡天命之去留也哉夫涉洪濤者必藉長年之柁救膏肓者必求扁鵲之方今中流而忽掣其柁臨危而亟易其方吾不知媚嫉者之意欲何爲也書曰媚嫉之臣以殆我子孫黎民其言豈不信然歟柄臣排擠多人而最彰灼者爲吳門文公會稽倪公文公有子爲竹塢遺民所著若定陵治略先揆識餘烈皇小識諸書

稱爲信史公有子爲無功先生著書尤富與鄭馬相埒卽
今所撰年譜當年時事無一不貫串於年經月緯之中非
僅一家書也海內稱二公子如靈光古殿璧社明珠嗚呼
二公之箕裘其不墜矣公又有墓田之錫予名祠之俎豆
食報視文公更厚天之報施不於生前而於身後不在當
世而在千秋公英靈毅魄在帝左右俯視茫茫塵土中有
帶經而耨者乃公之裔也有不懌然而笑乎倬方成童時
於章句之外喜聞時事見公三疏迴環誦讀每忘寢食私
錄是疏及武侯出師表老泉辨姦論歐公朋黨論及胡澹

上虞縣志校續

卷四十九

文徵外編

五

庵封事裝成一帙藏之篋笥塾師見之爲之大笑憶庚辰
歲朋遊越中公正在家居龍門高峙絳帳宏開四方執羔
鴈而來者日數百人倬亦在旅進旅退之中公不知此童
子爲何氏也時無功卽享盛名捧珠盤執牛耳人遙望之
以爲巨公宿德不知長倬纔二歲耳亦在弱冠時也倬後
入谷霖蒼學使幕中命倬同張子壇爲明史紀事本末其
於崇禎治亂一篇載公奏疏最多紀事體製每篇俱綴一
論獨於東林黨議一篇不復作論祇綴公數語於其後以
倣司馬遷紀秦以賈誼過秦論爲贊其竊取之意故有在

矣末學荒陋浮沉世俗固不敢妄學昌黎亦不能如龔聖
開作文宋二君傳惟與無功俱在老年結方外交吳越相
間二百里無絲覲面祇以蠅頭鼠鬚書疏來往相思有路
江山不隔今獲茲年譜當奉爲天球河圖永作世寶因跋
紙尾以誌私淑之意云門下士吳興徐倬謹薰沐拜手跋
韓桃平桓壘記
王猷定

盧龍韓子桃平以庚午遭變攜家南下卜浙之上虞居焉
己丑亂虞城復破徙會稽寓若耶之濱庚子冬予遊會稽
韓子坐予最高樓樓柱懸折梅丈許貯小餅內花半菱韓

上虞縣志校續

卷四十九

文徵外編

六

子愀然旣而憤爲告余曰傷哉吾壘之不復見也吾外曾
大父朱公名錦者宏治間守青州盜發齊桓公墓獲寶玉
刀劍鼎匱事覺藩王及諸有司分取之外曾大父得銅壘
徑二尺高如之土花繡蝕天將雨現五色雲氣光怪煜煜
不一狀歲臘貯梅其中自蕊而花而實三月不衰數傳至
吾祖寶之罔失亂後余置小驢載而南亡何虞城破吾壘
殉焉久之有言土豪陳朝廷者入余家攫去遣人屢求贖
不應夫以吾先世守之物不沒於盜而沒於豪其甘心乎
予曰甚哉子未曠覩於今古之際也且以齊桓言之當其

憤周室之燬於山戎也荆令支斬孤竹縣車束馬踰太行與卑耳之貉拘秦夏以朝天子何其盛歟及其亡也邱墓之不可保雖盜賊皆得而侮之山戎之於周猶盜賊也以周室之神器周天子不能自守山戎覬之桓公爲周天子報仇固周鼎四百年使山戎不敢窺春秋特書曰齊侯伐山戎大之也今以齊諸侯之墓守之二千餘年一旦見發於盜賊爲齊之藩王諸有司當必憤然曰此爲周天子伐山戎者也桓公之仇周天子之仇也抑我仇也藩王諸有司不能制盜賊又貪盜賊之物且爭取之爭取於數傳之

後厯喪亂而猶不忘是何溺於小而忘其大耶或曰罍得之盜賊之手非韓取之也今爲韓有矣有而棄之是忘其先世也曰非也齊之滅紀也紀侯大去其國襄公復九世之仇何有於罍迨頃公九年鞏之一戰而以紀罍獻之於晉使桓公有知必痛其子孫之不克守其社稷盜紀罍之不忘哉子休矣盜之發塚也山戎之禍也豪之得罍也紀罍之痛也子明於春秋之義其於輕重大小則必有分矣韓子曰然抱器而歸固予志也若子之言則誠大矣然則世之遭亂而亡其家者毋介介於一物之微而修怨匹夫

哉爲之記

送倪玉繩序

顧景星

日猶熱也月猶滄也風猶是豪豪蕭蕭水猶是滔滔也峙者山也方而下者跖也噬嗑者齒忽便溺者二孔也無有異而至言市朝風尚輒曰彼時此時雖號賢有智之人不能無變則何也噫可慨矣然而善觀變者于其時而善觀人者于其變崇禎十四年六月上繫蔡弈琛弈琛言去夏六月臣同邑諸生倪襄贄於庶士張溥之門歸語縣令丁煌言溥大有力立可禍福人溥結黨聲援陰握陛下黜陟

上虞縣志校續

卷四十九

文徵外編

八

之柄上震怒逮問煌煌服詔下襄獄是時溥已卒公論伸溥上用御史劉熙祚言取溥所著書覽而善之因遍閱溥諸弟子姓名襄適從獄上書上廷鞫曰襄何罪且善文其赦襄襄感泣誓以死報帝旣殉社稷襄書生無可死徒步走留都禮部請試七省流寓貢士而襄以夏邑籍舉第五人爲選吏始襄裘馬交游佳公子也聲名藉起爲名下士無何詔獄囚旣出折節礪行期立功名報天子而今則寄食江湖與余別八年矣遇于虎林幾不識爲故人疑其黃冠也旣而相與太息字之曰玉繩君安往日吾將挈妻子

鹿門吳市終吾世焉計玉繩生平五變爲佳公子爲名士
爲詔獄囚爲選吏今布衣長往其不盡時之變之與其時
之變之與比者海波飛立颶風吹山作平地大江白浪搖
天九首四翼三足之怪出沒君慎無往上虞君之故鄉重
巒邃壑可以觀草樹之蕃落閱候物之遷化悟陰陽之消
長蚤息而晏起飽食而安洩毋登東山弔謝傅毋陟覆卮
悲康樂毋南望大海想徐福之神仙毋西眺會稽思句踐
之甲楯吾聞鳳鳴玉京之洞真仙往來雲鬢雪肌晨肇柏
碩所未遇子其往焉吾與子之故人吳公超在日寒月熱

上虞縣志校續

卷四十九

文徵外編

九

風絕海竭縮鱗弭鬣毋爲豫且得于是舉酒三歌以送之
徐昭華詩序

毛奇齡

閨中傳詩自三百始顧三百多采藍伐肆執芟弋雁之婦
而其後班蔡鮑謝下及管李非名臣巨閥傳詩頗鮮蓋閨
閻夫婦操作不暇何暇與之言文章事哉獨是金閨窈窕
易於作僞故世傳李都御史妻陳懿遺詩半屬質成而近
年女士黃皆令游於諸家知閨中所作類有藉於補饒者
則夫閨詩之未易工也始盜徐昭華以詩傳人間者有年
其人慧生而產於世家父仲山君席大司馬公遺業著書

等身而其母商太君則爲冢宰公愛女稱工詩者然則昭華之能詩豈待詢哉第昭華嬌穉不屑就女傅卽隨兄弄文史亦未嘗斤斤爲學乃驟然搦筆相傳元夕隨諸姊觀燈曲廊向月獨吟遂有詩今集中絕句所謂看燈者是也乃昭華特好予詩凡繡枰鍼管脂盃黛鬢偶有着筆卽漫寫予詩以當散翫故其後謬呼予師而予得藉是數數課題面試以驗誠僞嘗窺其落筆時頃刻簇綵如弱羽之翻窠而新花之生樹雖使鄒陽子建強顏伸腕猶不得與之爭新鬪捷矧詠蒲吟絮何足相上予故曰如昭華者可令

班昭爲先後蘇蘭爲姊妹非諛語也特工詩實難雖曰閨房之文易於見傳顧亦視其工何如耳考風詩有名字者唯綠衣燕燕白華河廣諸篇其他有其詩而亡其名至若漢唐以後凡史乘所載宮闈書目自班姬左嬪道蘊令嫺以下合若干人皆各有集名存於目中多者十卷少亦不下三四卷乃數傳以降殘章斷竹或存或沒甚至通集遺軼有其名而亡其詩卽或統爲選輯若顏竣殷澶諸君所爲婦人集若干卷者今藏書之家亦並罕有而團扇一詩千古不滅則非閨詩之易傳而閨詩而工者之能傳也昭

華亦勉爲其能傳者而已矣

徵士徐君墓碑銘

毛奇齡

君仲山諱咸清上虞下管村徐氏歷世以科目爲京朝官祖諱鄰萬歷壬午舉人儼居會稽父大司馬諱人龍與伯父諱宗孺同母兄弟同登萬歷丙辰榜進士伯父還下管而司馬公留會稽之稽山門家焉君生而慧一歲識字五歲通一經甫畜髮卽能以官監生應鄉舉入場有文章名仲商夫人者大冢宰商公諱周祚女也國色與女兒蘇松巡撫祁公夫人俱能詩近世能詩家呼爲伯仲商夫人冢

上虞縣志校續

卷四十九

文徵外編

士

宰公還朝值司馬公以副都御史巡撫山東見君於官署而愛之許爲婚姻會國變司馬公以大司農起用被召中道旋返破產與兩浙巡撫黃鳴俊募閩左勤王不利南都建號者仍以公與馬士英同掌本兵而公怒卻之提一旅歸與故總兵官王之仁屯之西陵名西陵軍 王師下江東西陵軍潰司馬公狼倉走海上家人東西竄冀稍定而君方重病且以國難邁家難意托落無生人趣及行嘉會禮卻扇驟見商夫人大驚曰吾以是爲王霸妻足矣乃就故居稽山門辟寢前廣庭構以藥欄設長筵當中發故所

藏書散塚之而對坐縱觀暇則抽牘各爲詩如是有年天台老尼從萬年來遙望見夫人合掌曰此妙色身如來也蓮花化身相好光明旣而咄暗曰善持之善持之幾見曼陀長人間耶於是君與夫人約請各爲課程吾當著一書消此白日而子且從老尼請發願寫妙蓮花經三部以延其年何如夫人然之乃復自揣著何書吾研練經術久矣請合并羣籍而正定之以刺取其意與事之神世用者筮之得屯之五曰小屯吉大屯凶曰猶之屯爾靈爲其小者而已於是著小學一書博取楊雄訓纂許叔重說文以及

梁顧野王玉篇并後儒川篇篇海諸書以正字形取陸法言切韻孫愜唐韻暨宋祥符景祐間廣韻集韻諸書以正字聲而於是縱考十三經子史文集暨漢唐宋元諸大小篇帖凡有繫於釋文者悉旁搜博採以正字義自一畫以至多畫合若干字合若干卷名之曰資治文字而夫人齋蔬性不喜肉食至是斷之日給粥一盞酪一盞金菊湯一盞焚香滌指以辰申二時寫梵頁三番計三部合計所寫字二十萬八千有贏凡三年寫成會廣孝禪師大殿工竣三日尊者君方外友也率僧衆披衣拜於庭乞施一部去

供其一於殿極藁間周以朱木函而蟄結之使風雨蟲鼠俱不得蝕而納其一於毘盧遮那世尊腹中綴以金銀寶珠而幕以錦絨搗鼓集大眾宣揚之其餘一部則送之天台萬年龍藏中以老尼從萬年來也康熙十七年上開制科令京朝內外各舉郡縣有才學而堪與試者道府爭薦君君辭不得遂赴京先是閣中判詞頭照前代典例多用查議查覆諸字而高陽相公精字學謂字書無查字縱有之不作察解此必原判是察字而北無入聲呼察聲如查故訛查耳訛字何可用因啟奏御前凡判詞查字俱

改察字然終不解查與察沿訛之始至是應制科者紛紛至每至必合數十人謁相公門下君進謁高陽相公徐詢曰察聲訛查有始乎在坐無對者君逡巡曰漢書貨殖傳有之顧查爲在聲之訛非察聲訛也高陽瞿然曰何言之曰古在本察字爾雅曰在察也堯典在璿璣玉衡以齊七政是也第三聲呼在爲查以查與槎同漢書貨殖傳山不荏蘖卽槎蘖也而字乃從草而諧以在聲故在聲爲槎槎轉爲查則是查者在聲之轉也猶之在之又轉而裁爲財也若曰察之轉則是义也差也察豈能轉查乎高陽遽色

變乃復進曰察聲不轉查然而在卽察也改查爲察可乎
曰不可老子曰其政察察亦惟察名不可居故以在字隱
察名而轉聲爲查若改察仍察察也然則查可乎曰可曰
此則僕之所未聞也夫字必有義查字無察義而有在聲
使徒以聲同之故而不顧其義則道可盜也曰道固不可
盜而在則可查不觀在又爲裁乎在之爲裁察義同也然
而裁之又爲財則無義矣裁可財則在可查矣裁之爲纜
僅義同也然而纜之又爲才則無義矣才可纜則查可察
矣高陽憫然謝而起其後三相錄試卷糊名然終不用益

都相公薦於廷 上曰有著乎曰有曰何著曰資治文字
資治文字何謂耶曰字書也旁一相曰字書小學耳遂罷
旣而益都擬再薦不得君曰小屯吉吾向不爲大而爲小
此屯也然而吉矣吾幸得歸矣初君到京時益都相公欲
館君於邸會邸客將滿中有一客鄉人也作字補一書內
有鱗字註曰水雲角鱗遂音妻而入角部中或以問君君
曰呂覽曰水雲魚鱗未聞角鱗也客大恨遂沮之至是欲
再薦則同舍者沮之君歸而逍遙仍與夫人相對坐戀花
觀書越十年庚午七月七日微疾卒子東女昭華皆有才

名越中閨秀舊稱伯仲商夫人其後伯商夫人女有祁湘君者繼夫人起而仲商夫人則昭華繼之旣而昭華名藉甚過於湘君嘉興曹侍郎曰自左嬪蘇若蘭後文章之盛無如徐昭華者昭華婿駱生名遂襄錦乃爲詞曰平原康樂席世勳兮將率妻子居之吳市門兮闔戶著書其閒情兮如何翁思復舉明經兮區區小學等曲禮兮食肉食肝不如歸故里兮特負畚耜者非鴻妻兮老萊童鴻反北之荀倩兮七月七日黃姑上天兮竈門虛左將駐此妙色身兮君有子過中郎兮千秋之室堂堂兮

上虞縣志校續

卷四十九

文徵外編

五

王大夫述

胡天游

甲辰二月予自杭以舟而東有上虞人求載者狀甚遽叩之乃對曰吾大夫王君卒次歸喪京師吾將從邑人祖焉語終蹙然於是詢之曰子之君亦奚政之惠於若土乎訟息乎獄罄乎刑不施乎盜賊徒去乎利興而害剔而教化徧洽乎則默然哂遲然應曰否否然則子之情如喪親愛而不能已其若何曰吾大夫爲治訟卽不息而聽以平獄卽不罄無濫且有卹也刑不得不施而慎又從其省者盜賊或間發擒於庭治而諭勸之時時悛吏胥不得奸武猾

不得暴催科無有迫當事無有惑是盡心於民彼利之予而害之去教之行而化之及果令一人責耶吾固好游今天下割省大小十五嘗以至焉郡百數十州邑幾二千守長廉惠未數聞其貪黷殘鄙接壤連境符出一孔求吾大夫之政以賢於盜祿血國豈不謂遠哉如必子之云古吏之良也於今其奚獲焉予聞而喟然夫三代之上非賢且仁者無以泄官故其政均而民不知所頌三代之下所以爲治者旣衰若兩漢循吏猶多以養民導俗爲務後世益媮選舉術乖託要重者雖玷位無罪善諂賂者而牟賊曰

才是以民誹不服具瞻而嘻若王大夫於虞非有異施家感人說已懼若來者之難似然孟子曰饑者易爲食渴者易爲飲其信然乎吁

案王大夫失其名考稚威先生雍正癸卯副貢述首紀年甲辰爲雍正二年查職官表王國樑旗人歲貢康熙五十七年由山陰署任下接雍正虞景星三年任水利志五十七年知縣王國樑築塘至五十九年郡守俞卿築塘時知縣仍係國樑然則甲辰以前所謂王大夫者定當屬之國樑且述云歸喪京師正與表云旗人符合其爲王國樑無疑

明太保倪文正公祠堂碑銘

全祖望

尙書贈太保倪文正公本上虞人而居會稽今有司致祀皆就近蒞事於會稽而上虞反闕焉然會稽亦未嘗有特

祠乾隆戊辰知府場人杜君謂當建祠於上虞而苦經費無所出時予方主越中講席語君以上虞故有書院何不卽其中重新兩楹以祀公古之釋奠必於其國之先師公豈非上虞之先師也與是甚合禮意杜君曰善因捐俸鳩工特具粟主以入祠而屬予銘之因國之季天下所稱大儒戴山劉公漳海黃公而公實參之戴山爲公同里然其初人尙未盡知其學公與之語而歎曰劉先生今之朱元晦也每見學者輒語之曰勿坐失此大儒故年譜亦推原證人之學得公始光漳海爲公同年其在三館最相傾倒

甲申之難漳海哭之曰鴻寶死天下莫能宗予也夫顧戴山之學不甚合於漳海而公則與漳海之學相近乃其於戴山絕無間言遣其弟朗齋從事證人之社而長子無功受業黃氏去短集長不名一師斯其所以爲大儒也與公之學尤邃於易然所傳兒易內儀尙非完書特其儀中之一種所云易以者也尙有易之亦成書而未出其曰以者取彖傳曰之者取變卦也然又別有目云易像云易崇云易迭云易知云易趨云易成云易定云易歷云易律云易見云易統云易序云易配一如內儀之分列者其書皆已

起例削草而未及卒業予曾求之其家得其易之二卷手稿殘斷不完爲之太息蓋公說易大都在理數之間天門地戶淺學未能窺其藩也公之直節在朝廷精忠在天壤不特明史書之抑且五尺之童皆能道之獨是蘋蘩蕓藻之祀乃在講堂則所當言者乃公之學且公之學卽公之直節精忠所自出也諸生其能讀公之書引伸其墜緒而得公不傳之旨以見之力行者乎是則公之所望也乃若蕺山官爲總憲其清苦刻厲有布衣所不堪者漳海亦然而公則頗極園亭池榭之勝衣雲閣之風流當時所豔稱

蓋公先世故膏粱尊人四歷二千石亦行乎其素耳試觀其立朝死國何者不同然後知三先生之趨一也今天下士習之汙極矣諸生遊公之祠予請誦公易之之說以相勵易之有云兌之朋友講習乾道也乾惕及夕志潛於習氣躍於講志氣交發文明日見是故作朋求友者天子之事也以五見二乃曰利見大人利見者此朋友也人有大人之德則可以朋友天子天子不敢亢大人而臣所受教此飛龍所以无悔而乾之同人卽二之變也是言也自孟子以來未有言之如此巖巖者殆當公爲講官之時乎顧

公之言所以諷天子而吾引之卽以勵學者夫必有大人之德而後可語此其亦宜知所興起日夕講習自拔於犬馬艸芥之中以雪江河日下之恥也已公之弟元瓚卽朗齋嘗仕閩中爲太子賓客子會鼎卽無功嘗官職方參漳海軍其後皆爲遺民有高節應得祔祀予於公之主入祠旣已爲之迎神送神之曲至是爲之銘以復杜君其詞曰在昔元公晚徙廬山亦有朱子不返新安故香鄉火永矢勿諼大儒所生足重山川始寧巖岫色正芒寒三菁仙草以當蘋蘩文正騎鯨來往其間諸生敬哉玩茲微言

上虞縣志校續

卷四十九

文徵外編

九

跋始寧倪尙書墓銘後

全祖望

鴻寶先生在明諡曰文正其在國朝諡曰文貞當時禮部牒行浙撫下倪氏文卷可據也今明史並作文正誤矣初明人本擬諡爲文忠先生之弟朗齋願得文正或曰文正古未有以贈死難者朗齋曰是乃所謂得正而斃者也議遂定於是同難杞縣劉宮允亦用此諡并及於遜志先生皆以朗齋之言故也文貞之諡於義略同然終未可竟混爲一也

徐亮生公傳

毛牲

公名人龍字亮生其先人卜居管溪插折管於地管生遂
定居焉是爲上虞下管徐氏徐氏自明洪武乙卯迄崇禎
癸未多由甲科登顯仕齒序不闕以故郡之稱望族者先
之獨其以明經著者爲易爲書爲詩爲禮記而缺其一公
父鄰首以春秋中萬歷壬午鄉試而公繼之自萬歷丙午
舉春秋第一遂與其同母兄宗孺同以春秋成丙辰二甲
進士而於是徐氏一門得備五經高第者自公之父子兄
弟始公嘗曰吾嘗爲壻於陶文簡先生之門學爲文頗見
許可顧中原多事亦安貴此帖括爲哉每出入瀏覽或臨

眺輒留心韜略冀得當以報值神廟以視朝日夕竟輟館
試僅改公工部主事使荆權權未及竣而適有湖廣督學
之命以公爲能文也公之試湖一歲一科未嘗啟客幕校
文獨身攜僕日閱卷千百皆竟試之明日榜甲乙無一失
者其所甲士應舉多中式先是湖北文盛每科得解額十
七湖南雜猺獞荒略僅得十二以爲例至是湖南舉四十
九人爰有謠曰龍德何盛兮鳳德何衰其所謂鳳蓋湖北
學使者顧君起鳳也當其權荆關蜀寇樊龍等殺撫據蜀
江漢震動公與楚撫日議城守事甚具暨受命督學悉力

文事顧中心刺促嘗以武備爲念故事學使者僅止義陵
凡義陵以南辰沅郴靖諸地皆就試無一按其地者公毅
然請往或難之公曰豈有乘使車而中稅者自桃源南入
連山接嶺爭高競隘頽垣牽木間以叢篁初偃輦行至有
挽輦不得前者步趾裁通其榛梗冥接籐盤筓錯之間屢
絕供應或勸之還不許然公每度一關必徘徊相視詢其
形勢及度辰龍關徒行則盡得其要害後勦臨藍大盜預
知其險易廣隘以是也凡所至居人驚喜以爲開國來無
此事者遠近爭來觀及試則惟辰郡與盧辰二溪能爲文

上虞縣志校續

卷四十九

文徵外編

三

至激沅則俚歌謠諺雜成靖川與峒彝相半能通論語一
章者卽舉茂才時辰苦黔難文士皆從繕應門公拔其一
二稍俊者蠲之且風之曰是朝廷所以重士者也何地無
才苟能讀書通經術則朝廷正用人之秋亦何至伏櫪鹽
車趯趯叢篁間哉士人聞其言皆感動且有嘆息泣下者
自長沙終衡徧歷五千里凡八閱月而試成再試如之會
璫難大起公先試士時有策問數題侵璫爲璫所銜將中
以奇禍而不得其隙尋遷分巡湖南道參議公念親在且
老恐一旦不測以貽吾父憂因乞予終養凡十二年崇禎

壬申公父應吾公卒乙亥服未闋卽起分守嶺北道服除拜命公乃增拓贛南五城以舊城庠隘寇屢陷遂增南安城高廣各二尺興國城高三尺拓安遠城七百餘丈龍南城八百二十六丈寧都七百五十九丈諸增高與興國郴等圯者更築朝廷嘉其能已遷蘇松兵備道按察司副使而虔民留之制可於是三臺合舉尤異而大巡劉君復特疏薦公邊才會桂陽賊起其渠劉新宇李荆楚等分據牛矢蝦塘諸寨以數十萬賊累陷衡澧茶攸湘潭祁陽之間凡四省壤接如吉袁韶樂寧永所在告驚獨虔以公在多

戒備無犯旣而圍長沙復攻衡州兩藩之封於其地者呼救闕下上怒命兩廣江虔會楚合勦而檄公監軍舊例監軍非分守任僚佐皆難之以諷公公不許時沅撫陳君首議論撫公曰兵未動而遽議撫此示弱於寇也寇必不從縱愛民不忍斬艾亦必厚集兵威摧堅陷險力足死之而後徐以情生之沅撫然其言遂斬桂守所誘賊曾冬保等若干人以徇公乃揚言楚兵當勦我何爲先之况暑不興師盍散馬俟秋風生長嘶而前時六月二十一日天雨夜晦冥忽下令鼓三入牛矢寨賊不虞兵至大潰焚其寨牛

矢爲桂陽賊寨之冠聞牛矢破諸寨皆膽落先是文吏極輕武弁公督學湖南爲甲子科武闈總裁其策問痛言文武軒輊之弊武士皆感激及至贛首擢遊擊謝志良及叅將董大勝嘉其壯勇引之後幕計治盜事嘗脫所絛寶刀以賜志良至是以志良爲前軍大勝繼之志良遂自效乘勝連破數寨曰泃裏曰銅梁曰猴寨曰蝦塘擒賊雷天召蔣明宇等其帥劉新宇脫走者三而終獲之遂以七月從臨武與楚兵合於是參將大勝以偏師繼進其所破寨曰茶山曰香花嶺曰竹坳志良復從木灣鵝王寨黃沙寺轉

入並破二寨曰芹寨曰姜山生擒渠帥劉紅鼻劉思榮等八月與粵兵合旣又破高獠紫獠二源並搜檀源山破寨一曰石門其餘走羅源者願輸萬金犒軍中以求免勦不許會大勝自藍山還道經羅源公指授方略破殲之大勝以數騎追獲李荆楚於大板沖自六月至九月凡四閱月破寨三十八生擒賊帥十有八人斬級萬餘俘而歸者無筭公嘗謂虔撫曰兵無分制分制則其勢扞格而不行今合兵四省統制惟一蓋必規畫定而進退不疑號令一而期會不爽儲峙專而饑渴不貳虔撫然之遂悉以機務屬

公使便宜行事故公得專意肆志以致於成捷聞初已遷
公武昌道晉參政至是上特詔公至京賜對故事道臣無
取召者召之自公始時楊嗣昌以起復執政兼本兵念公
曾官楚冀相引重再拜執公手指所坐曰以此待公公初
應召疏譏時政與嗣昌忤至是見嗣昌墨衰絰在坐連矚
之愬言予十二年終養事慷慨激切嗣昌貽矚不知所對
遽引退旋會朝房議邊事嗣昌議增兵內防公謂有進禦
而無退守畫宮而守之是欲閑臟腑而棄榮衛也且未有
增兵而兵可用者嗣昌怒次日公復上疏力言驅之室中

不若拒之門外其利害難易相去甚懸上御平臺詔公對
初及守贛賑饑民事公曰飢民非可以槩賑也夫發帑則
病官閉糴則病民臣先示之以發帑之意且過稱廩庾豐
裕兼可給糴使富戶之閉糴者爭減值出而後定規畫取
閭師之識饑戶者別之約爲三等矜寡老病者賑力耕而
餓者貸之不責子能自全者平糴而於是全活者衆上素
寡言時同對三人皆無問獨問公全活幾何公曰以十萬
計上色喜及對他事畢退上猶顧左右咨嗟曰活人至十
萬亦幾矣時嗣昌在側遽曰虔戶版幾何而動言十萬此

罔上也上默然久之然終嘉公能諭吏部遇督撫闕推用
遂超拜都察院右僉都御史奉勅巡撫山東登萊東江等
處陛辭賜銀兩紵絲表裏遣中使四人扶肩輦出都觀者
榮之及至鎮歲饑題免積逋銀四萬七千兩捐本年租增
修昌邑濰縣諸城改築平度州爲石城一如守贛之五城
者孔兵引朝鮮船至旅順鳴鼓告急公方治文書展卷不
輟密檄津門山海之爲犄角者乃令標將余國祚預貯火
筒以焚其船至夜襲破之獲大銅礮三十餘架東海之覬
伺者自此頓息特慮流寇勢橫將阻漕欲疏膠河故道傍

通海運旣已親歷相視具有成畫疏入嗣昌銜夙怨謂漕
非公職嚴飭之初公赴鎮時屢以他事奪公俸至是奉嚴
勅知事不可爲自陳奉職無狀請告歸無何嗣昌以督師
死衆望公起會兵部增設右侍郎備邊關制督之選廷推
公爲副以覘上意上見公名卽報可疏辭不允甲申復首
推公戶部尙書時倪文正司計力薦公可用故事計官無
浙人者上特用文正今復用文正薦特旨兵部馬上催公
入京至淮聞闖變慟哭草檄討賊劉忠端見公檄曰信矣
遂詣浙撫黃君同舉義以應宏光朝馬士英兼本兵公仍

爲副每同堂坐機事一決于士英公不平求去且每在堂
公正色危坐士英踧踖不自安遂分部事判兩堂命公督
理駕庫漕運暨公諫罷朝語侵士英且極言安置四鎮不
宜以廬鳳淮揚祖宗湯沐重地遽予之擁兵自衛之人夫
帶礪之盟俟有成績卽事在急遽爭先歆賞亦必策以自
效使恢一城卽予以是城復一地卽予以是地當前激勵
未爲不足乃兵未卽動而遽刻內地以畀之江南尺寸土
可勝劄哉士英惡其言諷臺臣劾公無可劾乃使御史何
綸論公耄失拜舞儀勒致仕時公年六十有九矍鑠進止

上虞縣志校續

卷四十九

文徵外編

三

步履無少誤者江東監國起公工部尙書及閩中建號以
武英殿大學士兵部尙書起公遣公門下士閩撫吳君春
枝賫詔諭促公入閩不答杜門卻埽者七年臨卒流涕曰
吾頗知兵且官兵當國家需兵之時乃不得效死爲國家
用

倪文貞公傳

蔣士銓

倪公諱元璐字玉汝一字鴻寶紹興上虞人父漣萬曆甲
戌進士官南兵部郎定船政軍衛戶祝之出知撫州歷守
淮荆瓊三府所至稱循吏公性奇敏五六歲卽能文字作

牡丹賦識者目以公輔才天啓二年登第改庶吉士授編
修首輔葉向高嘗曰三年無片刺及吾門只一倪君也五
年冊封德藩移疾歸泊還朝魏奄爵上公配孔廟公典試
江西命題譏切奄怒甚會莊烈帝登極奄伏誅得免於禍
崇禎元年遺黨阮大鍼楊維垣等護持舊局力扼東林公
抗疏分別邪正之界并請召用韓爌文震孟辨鄒元標非
僞學請復天下書院維垣再駁公再疏柄臣以互詆兩解
之時逆案未定奄黨猶存得公首先抗論清議始明而善
類亦稍登進尋進侍講四月請燬三朝要典帝命集廷臣

上虞縣志校續

卷四十九

文徵外編

三

議遂焚其板時同郡來宗道曰詞林故事惟香茗耳何事
多言朝列因呼爲清客宰相公又與兄御史元珙追論故
相魏廣微顧秉謙不職詔援焦芳例黜廣微爲民秉謙削
籍于是科道中毛羽健鄒嗣祚高宏圖顏繼祖相繼劾逐
魏黨旬月盡去上親定逆案分七等禁錮實公三疏啓之
也四年遷南司業再遷右中允上特重武科始命行殿試
涿州馮銓子負技勇而下第中官以聞帝疑考官有意抑
之悉逮下理勅公偕方逢年再試事竣公白其無弊請貸
之是時輔臣韓爌錢龍錫劉鴻訓相繼罷而溫體仁周延

儒入閣右中允黃道周以救龍錫謫外公疏稱道周行清
識卓非臣等所及願以己官讓之代貶又薦前府尹劉宗
周清正剛介宜召還京師以勵風節皆不報因四乞歸省
不允政府陷以美遷公曰平生不愛熱官不喜居要人牢
籠之內石齋輩旣去而我獨留有醜面目矣辭焉六年遷
左諭德充講官晉右庶子掌坊事上制實制虛各入策其
端政本則規切體仁云恩怨不橫于胸好惡必循人性毋
徒傷元氣而情面仍存毋浮慕虛名而叢脞滋甚毋以意
見仇獨立之士毋以聲顏拒來告之人如此則材識自生

勲猷自著體仁銜之八年正月流賊陷鳳陽焚陵廟公謂
此國家大辱請上下罪己詔悉蠲崇禎七年以前逋賦且
謂及今不圖必至無地非兵無民非賊刀劍多于牛犢阡
陌決爲戰場陛下安得執空版而問諸燐燹之區哉上從
之然體仁條列赦款率以空名塞未盡行也公在講幄撰
講義以催科賦額箴切時政體仁謂語意峭急發改公曰
啓沃自講官事此後峭急方盛耳必爾當去官一日講說
命惟暨乃僚罔不同心體仁在側公語直侵之上怫然抵
書盡几端仰首上視公徐申正義上爲霽容其諤諤如此

俄陞國子祭酒先後列上十四事皆援祖制作人才上可
其奏意甚嚮之一日手書公名下內閣命以履歷進體仁
大恐顧臺省無可諭意者值誠意伯劉孔昭謀掌戎政乃
嗾之訐公封典事言其妾冒妻封章下吏部蓋公爲孝廉
時娶豕宰陳有年女以貴介故失禮於姑公凜母命不得
已出之約畧如陸放翁出婦故事而以所受負郭數頃盡
給之俾長齋繡佛以老旋娶于王始成進士故鄉試錄載
娶陳而會試則娶陳娶王並載于錄然旣與義絕則例不
得封也時同郡尙書姜逢元侍郎王業浩劉宗周及兄元

珙皆言陳氏以不順于姑被出繼娶王氏非妾部議行按
撫勘奏體仁意阻卽條旨云登科錄二氏並載朦混顯然
何待行勘擬削籍上察其誣改命予告歸里十五年寇燄
且熾九月廷臣交薦公乃起爲兵部右侍郎兼翰林院侍
讀學士以母老辭詔促之明年入都陛見言今之本謀在
乎人主力行仁義提振紀綱且今天下大勢西北已日就
凋敝則東南爲財賦重地請以九江爲中權武昌爲前茅
淮揚爲後勁特設威望大臣統之無事則通貨貿遷有警
則南北兼顧此富強之術也帝甚喜乃注意相公矣陳演

既陷延儒以罪忌公入閣詭入告曰天下洶洶患兵農不
得人今廷臣才望無如元璐與馮元飈耳上不察即日拜
公戶部尙書兼翰林院學士而任元飈兵部公以祖制浙
人不得官戶部辭上不聽且引高皇用宋濂劉基爲喻公
乃拜命五月上生節要義疏及郵車戶改雜折省弁職等
事上皆從之五日三賜對公進三說謂戶兵二臣當同心
計畫準餉以權兵準兵以權餉被寇之區餉多虧折敗軍
之壘兵亦消亡彼此相權則數清而用足若小生小節無
益于事必求一舉得數十百萬又必有利于國無害于民

上虞縣志校續

卷四十九

文徵外編

三

且云臣本儒生諸所設施豈可權宜苟且臣必以仁義爲
本苟厲民臣必爲民請命上曰卿眞學問之言本原之論
也乃與元飈同志鈎考兵食頗有裨益中外倚之而時事
已不可爲帝亦以用二人晚悵悵而已故事諸邊餉司悉
中差公請改爲大差兼兵部銜令清核軍伍不稱職者卽
遣人代之先是屢遣科臣出督四方租賦公請專以歲計
責成撫按毋煩朝使自軍興後正供之外有邊餉新餉練
餉之目吏緣爲奸公請合爲一又請收漕天津歲運關隘
薊永三百萬石內扣五十萬石輸太倉用四十萬金折給

四鎮米石入錢太倉得米而邊軍喜得金上下便利又請直省修舉朱子義倉舊法以備凶荒時國用日絀公不得已請開贖罪例且令到官滿歲者得輸資給封誥又請做元人海運策可歲省金錢四百餘萬帝皆報可當流賊之起也勦撫互用飄忽難制公謂此猶流水其勢浸盛倘令雄踞大都按兵四出本計一定不可復禦矣及李自成據襄陽進取唐鄧規畧大河以南將北渡張獻忠自安廬西入蘄黃窺武昌以爲聲援公謂二賊當離之使不相及乃可專力以圖自成授首取獻忠易事耳又大帥左良玉以

縱掠荆楚心懷兩端宜薄責往咎厚責成功乃白之上請命鳳督及淮皖鄭豫諸撫臣畫疆自守進秦督孫傳庭尙書督師七省率諸將分道南下勦自成命左良玉沿江伺便進擊以是傳庭拔寶豐唐郊逼賊襄城而良玉亦收復承天及荆襄諸屬縣會傳庭軍饑爲賊所乘退保潼關自成乘勝長驅潼關陷傳庭死之公撫膺大慟曰嗟乎垂成之功隳于一旦天下事安忍復言乃上疏謂今天下雄藩無如秦晉請賜勅諭之如能殺賊不妨假以大將之權事平益封一子以報如遜不知兵令悉輸所有餉軍毋齎盜

糧未幾西安破秦藩累世府庫盡爲賊有焉十二月陳演
魏藻德皆以計臣起家詞林錢穀終非所長爲奏上曰計
臣誠實心任事顧時艱未能速効耳方岳貢具言元璐清
操練事不可易甲申正月上命措餉百萬公奏部帑不滿
二千外解未至且奏浙中亂民許都之變勸上停止開礦
造鈔諸法乞收回成命上乃不悅令以原官專供講職仍
視部事候代至二月晦始以吳履中爲戶部左侍郎筦計
務是月命李建泰督師公謂賊旣入秦則邊賊當在晉晉
有備而後進可戰退可守今黃河千里處處可渡請責沿

河州邑各自防守赦今年田租之半使人有固志又改軍
籍爲民籍令輸粟入官永免勾補可致餉千萬未及用而
山西陷矣上猶遣科臣中官四出催餉並徵贓罰贖緩公
悉阻罷之賊勢旣逼公密請命東宮撫軍江南以鼓士氣
而繫人心不聽又請懸重賞募敢死士五百人可破圍召
勤王師亦以爲無及公嘗歎曰今上憂勤無失德之事但
兵餉空乏是以聽言用人定封行賞多出忙亂吾有一死
以報君耳都城陷日公母在浙八十有四矣公整衣冠北
謝闕南拜母書几案曰南都尚可爲死吾分也勿以衣衾

歛暴我屍聊志吾痛遂南向坐取帛自經而絕福王贈太保吏部尚書諡文正

皇清賜諡文貞命有司祠祭焉

公耿介伉爽在翰林時客有佳紙乞擘窠書已揮十字問知爲中官物欲遽裂之客奪而竄一縣令求草制致束帛內裹黃金公受帛返金矚然自矢及任大司農庭可羅雀無敢以私干者公生平學問師鄒元標而友劉宗周黃道周其持論每自淺近以入深微嘗謂人之附小人者必小人而附君子者非君子名節之士或有所矯激或涉于假借皆自欺之病也故學以誠爲主又謂立品始於有恥自

上虞縣志校續

卷四十九

文徵外編

三

嘖蹴爾汝之間擴而充之逐漸體勘恥爲不仁則勉而爲仁恥爲不義則勉而爲義又謂人當清夜時檢點旦晝所爲便有多少不慊于心處從此隨事警省卽集義之方也嘗稱宗周曰劉先生今之考亭歷年又曰念臺是當今第一人物歷年又曰此老真大儒胸中無所不有不但清孤可信也其虛懷樂道如此公所著兒易及春秋鞠通二書皆有關經學又奏疏十二卷文集三十餘卷子會鼎編輯完本藏于家

黃肇敏家傳

汪 沆

肇敏字克成姓黃氏上虞人少穎慧讀書過目不忘年十七爲學官弟子性伉爽不畏強禦樂救人之難窶人子負官鏹將鬻妻以償相持而泣肇敏慨然爲代輸邑有武弁縱兵凌百姓勢張甚莫敢枝梧肇敏列其罪狀揭于監司監司陰庇武弁持兩端不下復揭于院弁卒落職去一邑稱快四十貢入成均戶部侍郎李仙根疏薦于朝辭不赴歸葺漱芳軒貯古法書名畫吟嘯其中以自娛樂同邑周聲鴻能文家四壁立肇敏引與友尋爲治裝促其游學京師聲鴻渡錢唐江盜胙其篋垂橐以歸肇敏又割膏腴田

以資之旣行仍振卹其家使紆內顧憂比肇敏入京聲鴻已譽滿長安矣逾年聲鴻授河南商邱令緘書招肇敏肇敏念不見故人久爲之命駕留一月卽歸瀕行聲鴻厚報之稔其介不敢遽進因密置千金篋中戒僕人勿泄肇敏抵家啓篋僕以實告肇敏歎曰我知故人故人不知我何也雖然返之逆故人意吾爲周君代宰可也乃召貧不能葬及過時不能昏娶者給之一夕立盡肇敏家居撰述極富卒年六十二旣歿之二年有宦于粵東者致賻三百金云貸之昔年家人無一知者蓋其生平陰行德而不求人

知類如此

孝靖倪先生傳

茹敦和

孝靖倪先生會鼎者字子新晚而自號無功明忠臣文貞公元璐子也年十六補諸生其時於書已無所不讀會漳浦黃先生道周方謫官江西以病稽於越文貞舍之衣雲閣命先生稟學焉既而黃先生復被逮廷杖下詔獄先生從之京師經營橐篋受學於獄中黃先生戊辰州阻於賊未赴先生從之大滌又從之武夷會文貞以兵部侍郎召先生始歸崇禎十七年三月明亡莊烈帝崩文貞死之四

上虞縣志校續

卷四十九

文徵外編

三

月越中變聞左都御史劉先生宗周蘇松巡撫祁公彪佳吏科都給事中章公正宸等皆衰絰荷戈慟哭於軍門請討賊而巡撫黃鳴俊不時出師先生以文貞樞在賊中將微服北行乃募壯勇數十人與俱布討賊之檄於天下南都既立福王福王亦無意出師而我大清兵入關討賊賊竄走遂葬莊烈帝於思陵先生亦得扶文貞柩以歸先是文貞在兵部以擒劉超故蔭一子錦衣僉事至是以殉難故又蔭一子錦衣僉事先生當得兩僉事明世武臣無丁憂例累檄促之赴官而是時皖人阮大鍼翻逆案驟起

掌兵部事先生遂以喪服辭不赴也南都再亡唐王聿鍵
僭號於福州漳浦以大學士督師承制授先生職方郎中
監其軍事先生復以喪服辭漳浦遺之書曰屬以時事之
艱思借箸於君非敢以一官相溷也正使縞冠素鞵出入
戟門於君何譏於僕何損先生雅不欲與唐王事以漳浦
故不可以不赴迺趨趨廣信臥邸舍待之漳浦至議兵事
多不合漳浦憤然曰君昔者在吾前智略輻輳今喋喋如
此老生耳先生曰先生正欲爲火迫文天祥然於事無濟
若何婺源敗漳浦見法於江寧先生請其元葬之事畢遂
歸杜門不復出順治九年

上虞縣志校續

卷四十九

文徵外編

三

世祖章皇帝褒恤明代忠良贈謚葬祭咸備先生北向稽
首慟哭曰 新朝之於先臣至矣而遺孤墮艸莽將何以
報哉念生平經世之學所受於漳浦者尙歷然胸臆間乃
彷彿四通二衍之例臚爲一書以告六官長屬冀以裨補萬
一書凡二百七十餘卷名之曰治格會通其自序略曰予
少聞禮於趨庭長執經於漳浦妄以習聞臺閣自許無何
銅馬蔓滋潢池羹涕攀髯灑碧岵裂山頽恭際 聖皇整
旅入關受天成命奄有九夏揆文奮武以開萬世無疆之

休於是仰山川之再秀觀日月之重光攀龍附鳳之彥罔
不出其經綸以黼黻明盛小人有母奉菽水咏太平已耳
會老友蔣子杜陵來自雲間以網羅散失相屬予心韙之
特念四通二衍互進迭興而世鮮湛深之士者以有二畏
也編簡浩繁望洋無際則畏之端倪雜見作止屢遷則畏
之我思古人厥有二道溫公作通鑑時流猥以引睡機伸
愚之離爲二百餘事事爲本末俾若散錢之歸緡貫而後
天下知讀書之樂東萊作大事記又復爲之解題考亭善
之稱其一句便括一段使如尺衡之占象緯而後天下無

泛讀之憂今法機伸則多其綱目綱有一總以統其全目
有巨細以析其妙層積眉列而本末自出則錢無不連於
貫者矣法東萊則歸重細目連篇累牘之文括諸數字轉
喉凝睇之始洞其指歸則緯無不周於衡者矣其次則言
刪通衍相積其勢不得不刪然刪恆不刪特刪同不刪異
刪遠不刪近刪瑣不刪大刪文不刪義其大指也亦有事
本恆瑣而不刪者如屯田牧地則存其境址賦稅課程則
存其規額下至農桑畜牧器用百工旣關治道則不得而
去亦有事屬殊特而刪之者如氏族六書七音以至金石

草木之類博雅所資而無關政要則亦不得而存又其次則言述四通遞嬗續考最後畫於神宗之中祀今以崇禎爲屆四朝典故雜而難稽史志未成稗官叢謬雖就所聞見紀之心焉惴惴不容不跂足於後來之彥也若夫熠燿微明夸稱尙友竊窺往世所操不同杜王矜慎評隲眞贋纖鉅畢宣漁仲天資敏妙瞻矚高遐雄辯所歸不無武斷求其渾脫經史鎔鑄古今層折入微動中窾綮厥惟馬氏所願學也苦才之不逮蚓唱蛙鳴自適己事已爾六十而濡毫八十而輟筆擯鑪卻扇心摹手追生平精力盡於此

上虞縣志校續

卷四十九

文徵外編

三

書冀或免於躡車覆瓿其曰治格者本諸西山大學衍義所云治天下之律令格例也會通有三義言學者以研辨通之言治者以因革通之而言六經言三代者又必會兩漢唐宋元明以通之也先生旣孜孜撰述一切外事皆不問康熙二十年越大水西江塘圯自臨浦至褚家墳決口凡十三處當事者務苟且欲小小補苴先生慨然而起謂宜台山陰會稽之力以助蕭山按畝而輸分段而築務爲百年之利而是時鄉人姚宮保啓聖方總師閩中議并修三江閘馳書請先生主其事先生乃刻其石以禦湍流其

餘烹秣灌鐵一如舊法又修磧堰麻溪壩治其黃洞之淤塞文移書牘商榷詰難相往復者蓋數百萬言皆先生手書自辛迄壬廢寢食者一載有餘而後訖工工既訖復孜孜撰述如故漳浦戴山皆文貞執友而先生之學主漳浦不主戴山其所與遊如黃處士宗義姜京兆希轍董山人瑒以至孟學思祝守壩等皆戴山弟子宗義著明儒學案七十卷先生亦著明儒源流錄二十卷以明示異同其他自詩文集外又有古今疆域合志越水詹言等書皆與會通相表裏膠州高相國宏圖遜荒居東城禹跡寺先生繼

上虞縣志校續

卷四十九

文徵外編

三

粟肉終其身雲間蔣大鴻平階卽所謂孝友杜陵生者也寓越主姜公子垚先生亦時調其困乏其後遺民逸老漸次凋謝而先生享大年巍然獨存或以爲得金丹之術先生笑曰非也康熙四十五年終於家時蓋八十有七議謚者宜興陳維崧

徐漢官學士傳

章學誠

徐公諱復儀字漢官出上虞徐氏幼穎慧其宗人禮部主事觀復早挂冠歸隱居於太平山選宗之俊穎而造就之尤賞識公嘗謂公曰子學問氣節不讓古人但數乖爾太

平山深氣寒多積雪雪深丈餘瀾漫亘數十里迥冰夏始解寒芒射目不可逼視公心契之自號雪潭敏於爲文或與人對弈振筆而書輒有奇氣弱冠爲生員崇禎十五年壬午舉鄉試癸未成進士值祖母陸太宜人卒疾馳歸明年聞國變公投袂起曰君父仇不共戴天卽北行會福王監國南京因匍匐上疏言大恥未雪逆賊未擒梓宮未還國殤未恤太子二王未復宜義戰毋利戰宜力戰毋舌戰宜公戰毋私戰時朝士攻訐成習而奸輔馬士英方鬻官爵報私恩怨總兵高傑黃得功又構兵淮揚故痛言之不

上虞縣志校續

卷四十九

文徵外編

罕

報授刑部主事尋陞本部員外郎乙酉推公主考雲南就道未數日而南都亡時所在阻梗雲南副主考與貴州主考無行者或勸阻公公曰在國殉君奉使則殉君命此大義也且邊徼人心未知虛實必生觀望吾姑以文教羈縻之使有所繫而不散庶幾或有興者其庸有冀乎崎嶇至雲南與巡撫司道言之俱北嚮哭公因勸以勤王不能用也然人心洶洶城門晝閉公告大吏宜鎮靜毋遽張皇校試榜揭如治朝民間賴以稍輯還過貴州撫按請公主貴州試公不可巡按遂自試之故是時明無主而雲南貴州

取士如常制也會唐王稱尊號公趨詣復命改翰林學士
公辭曰翰林學士所以潤色太平此乾坤何等時臣不能
馳驅効命猥賜追陪清宴臣死無以塞責時政由鄭氏公
內不能平乃棄官去抵浙聞閣臣黃道周被執心益痛爲
詩哭之未幾福建敗唐王被執又未幾西陵軍不戰而潰
魯王航海公撫膺慟哭曰無能爲也遂歸拜父母牀下泣
曰兒欠一死爾兒不肖願大人自愛無以兒爲念遽辭去
不知所往或登崩崖躍墮地或夜臥林麓虎豹來觸之不
動幽篁雪窖間樵芻或時見之輒避匿不語公未有子或

上虞縣志校續

卷四十九

文徵外編

聖

諷以父老宜爲後嗣計不答繼室黃妾范先後以憂死不
顧所愛女天殤不哭亦不問也如是數年人無能蹤跡者
會天忽大風雨晝晦公暴卒於山麓死狀人無見者或曰
兵四合家人散去公歌采薇之詩是夕野死翌日父往視
之目箕張哭曰兒死不負國矣無以我爲念乃瞑祔葬於
參政公之兆公死無後乾隆七年族生員自倣建三忠祠
祀七世聘君文彪九世少卿學詩及公而三先是同府諸
生傅列張等祔公於府之七賢祠因爲文以祭曰維年月
日後學諸暨貢生傅列張山陰廩生張宗城會稽生員陸

曾亦率八縣諸生奉明翰林學士前刑部廣西清吏司員外郎上虞徐公神位祔祀於忠端劉先生諸先賢之祠而進其說曰忠義之於國家猶人身之有元氣尼父則曰殺身成仁子輿則曰舍生取義世儒繹之則曰總成一是一而已嗚呼乙酉之變王師渡江金陵瓦解列城趣降孤臣銜命萬里遐荒崎嶇危難險阻備嘗流離顛沛之中不敢委君命於草莽繫人心於一綫羅甲乙而揭榜報簡書以無愧辭學士之清班知時事之難爲遂間道以趨還進謝高堂白髮之悲退深故國黍離之痛指黃泉以爲期仰蒼

上虞縣志校續

卷四十九

文徵外編

望

天而長慟可以不死而克死先生之仁成矣先生之義取矣先生之死且不朽矣而某等誼切鄉閭慕矜山斗老親如昔皤然黃耆春秋霜露承祧無後魂兮歸來能無恫乎時之不偶嗚呼先生自以致身通顯國恩難忘龔勝比潔伯夷爭光與其汗顏以生孰若潔身以亡子忠父教理順心康此則先生所以獨求其是成仁取義而處變如常者也某等僉謀合議以爲如先生者允宜俎豆於念臺諸夫子之堂庶幾同德比義合享馨香載斟載酌彷彿來饗

訓導連君傳

李慈銘

古之所謂鄉先生沒而可祭於社者非僅以教子弟興廉讓也本其肫然仁物之心由一家以推之宗族推之鄉黨以及於一國而其所施爲遂可爲後世永賴而國蒙其利嘗攷周官大司徒以鄉三物教萬民其二曰六行孝友睦婣任恤而不然者有刑其屬族師則書其孝弟睦婣有學者閭師則書其敬敏任恤者而鄉大夫三年大比攷其賢能而賓興之故朝有得人之效野無滯賢之歎後世鄉失其職鄉舉里選之法變而爲九品中正又改而爲科舉士之賢能特出者無由自見乃退而自力於鄉以展其效於

上虞縣志校續

卷四十九

文徵外編

三

國然朝廷終無以旌異之雖功行顯顯萬衆指覩亦止託於儒生之文字以冀或傳於後若上虞連君樂川者爲可慨也君諱仲愚世居上虞之松夏自少爲縣學生有聲然不屑爲科舉之學家世衣冠田廬殷賑內行全備善無不爲而其一生所致力者在江海兩塘蓋松夏爲上虞之西鄉其地負海前臨曹娥江而承新昌嵯兩縣之下流山澗瓴注潮汐侈擊於浙東塘工爲最險君熟悉利害銳身任事於道光三十年則有塞十七決口之役於咸豐七年則有築臨江大牆之役於賀家步則立柴塘以護之於後海

之石塘則爲衆擎會以守視之又以孫家渡爲全塘扼要之地營別業其上建留耕山房及捍海樓蓋將終身焉於此而君亦旣老矣未幾遂卒蓋竭其財與力於塘而一息不自懈亦可謂能捍大患以死勤事者也然而宅里之表無聞配社之賑不及而所謂賢能之興者皆出不能效一官處不能善一事浚公私以爲己利而已嘗慨近世旣以至庸極陋之文取士相沿成格莫敢變議其不能得人亦夫人知之而無可如何至於賢良方正孝廉方正之舉本朝廷之特典有無多寡非有恆例宜若可以得人而何以

所舉者率多鄙詭險污偸名實而不顧求如君者蓋千百不得一焉下喪其眞而上受其弊此論世者所爲太息而不可已也以君之所爲於周官六行無不備而彼之所謂恤者不過振憂貧者耳蓋其時溝洫滄川之制畫然一定所以固隄防而時蓄泄者上之人無不以爲先務自遂人而下官盡其力無待於民亦以事之難者不敢以期之人而賢能之所書不過振恤而已也然則如君者使得生於其時其設施又何可量哉君以援例候選訓導加光祿寺典簿銜生於某年月日卒於某年月日年七十君之規畫塘

事編修俞君樾爲墓志言之已詳故述其大要其他義行亦弗之及著有塘工紀略四卷敬睦堂條規一卷

李慈銘曰事非知之難行之難士夫平居議論視天下事無不可爲及當之鮮有不撓者歲乙丑越中大水西江塘大決余時里居郡守高君強之治塘余始視地形籌土石薪木之費以爲事可立辦旣而吏之老而悍者掣其權民之獷者梗其議冒利者競進嫉忌者力構衆口踴騰危欲敗而僅免始歎任事之才不易而鄉里爲尤難也比十餘年浙吏大治仁和海甯兩境海塘歷巡撫已四政糜帑金至七百餘萬而事猶不集海甯尖山之塘浙西稱最險與上虞之江海塘比者也官吏道謀未知所措安得起君而詢之哉

上虞縣志校續

卷四十九

文徵外編

三